

Pertgei has buca tratg o tiu corset Margriata?  
Treis emprovas d'avischinaziun ad in mitos

da Maria Cadruvi

I

Bunamein siat stads eis ti stada ad alp – „mai quendisch dis meins“. Sco zezen.  
Sco um. Tgei dunna!

Plitard han umens scret sur da tei e dunnas han cantau tia canzun. Mei has ti interessau naven dil mument ch'jeu hai udiu da tei. Mo aunc dapli has ti irritau mei. Quels quendisch gis ch'han muncau per che tiu temps secumpleini, pertgei has buc saviu viver els sco um e dar empau adatg da tes seins alvs? La caussa fuss stada lugada ed emblidada. Igl ei reussiu a ti da snegar tia identidad bunamein siat onns. Mo il paster pign ch'ha traplau tei eis ti buc vegnida da far stuppar la bucca. Tgi era el? Tgi eras ti? E tgi era vies signun? Jeu hai bia gadas empruau da s'imaginar co ti eras. Vesev'ins la dunna en tei? Ni vevas strenschiu ensemble tut, buc mo tes seins? E tia vusch, ha quella mai tradiu tei? Ni eras ti ina dunna senza tuns? Eras culs patratgs zanu'auter cu ti eis „dada giu sin ina nauscha platta“? Ni has forsa vuliu scarpitschar, perquei che ti vevas en tetezza avunda da tiu teater da vuler esser in um?

Miu catalog da damondas ei aunc liungs. Jeu less schar ir el sco ina spirala entuorn tei. Per vegnir pli datier da tei. In gi eis ti pia ida dil stavel giu ed eis ruclada ch'il paster pign ha viu tes seins alvs. Il buobet, sco ils biars affons plein marveglias e spir plascher da raquintar vinavon zatgei niev, ha vuliu gir a vies signun che ti seigies ina dunna e buc in um. Pertgei eis serebalzada taluisa? Pertgei has buc lubiu a tetezza da mussar che ti seigies malsegira, che ti hagies tema? Jeu capeschel buc pertgei ch'il paster pign vess duiu commetter in tal malfatg. Ti has gie snegau tiu esser dunna, el ha mo scuvretg tiu ver esser. Gia tiu marcadar tradescha tia fleivlezia. E lu tia stinadedad. Pertgei buc conceder che ti hagies giugau ina rolla e basta. Danunder vevas insumma tes beins? Las camischas? Las nuorsas e las vaccas? Il curtgin ed il mulin? Ni has semplamein fatg queidas cun tias empermischuns? Senza la minima intenziun dad è tener elllas? E lu - tgei impertinenza da tei da sfundrar il buob ella tiara – „treis tschuncheismas ault“. Has ti profitau dil taliter da tia posiziun sco zezen, che ti has entschiet a disponer sur dil proxim fleivel? Sco quei che ti has dumandau il paster pign. „Pertgei fas quei, miu bien paster?“ less jeu dumandar tei: Pertgei has fatg quei sontga Margriata? Il fatg che ti vegnevas numnada sontga sa gie strusch giustificar quei pass. Pertgei eras sontga? Veva zatgi declarau sontga tei? Ni eras sontga da naschientscha? Sco in'autra ei beinstonta da naschientscha? Ni eras mo ina sontgetta? Jeu vai l'impressiun che ti eries in tgaubotsch. Cunquei chiei va buc sco ti vul, fas ti svanir il paster ella tiara e ti tezza svaneschas ord l'alp. Buc en tutta tgeuadad. Na, ti pirentas aunc tut avon ch'ir.

Ed il pir: Tut che fa per camond a ti. Las vaccas dattan buc latg pli, la fontauna vegn schetga, la plauca secca e la jarva cala da verdegar. Era quei tia jarva? E danunder vevas ti talas forzas? E pertgei has dau neu elllas ton da levessenn? Pervia d'in buobet, ch'ha viu tes seins alvs e che leva ir a raquintar quei al signun, has ti tratg tut tes registers. Vevas pers la relaziun cun tetezza che ti has saviu inscenar in tal drama? La legenda raquenta che perfin ils zenns hagien dau triev a ti. Nua eis ida? Turnada eis aunc buc.

## II

Ti eis stada siat stads ad alp – „mai quendisch dis meins“. Sco dunna en vestgadira dad um. Perquei ch'ina dunna mava buc ad alp. In gi eis ti ida dil stavel giu ed eis ruclada „sin ina nauscha platta“. Ti vemas buc strenschiu lezza damaun ferm avunda tiu corset ed aschia ha il paster pign viu tes seins alvs. En quei mument has ti fatg persenn ch'ei seigi uras da calar da vuler esser anoviars zatgi auter ch'endadens. Ti has tratg o tiu corset. Has mussau che ti seigies ina dunna. Il paster pign ha giu plascher. Tuttenina deva ei denter la fumeglia dad alp in signun ed ina zezna, in um ed ina dunna. Il signun denton ei vegnius malsegirs, ha giu tema da tei, da sesez e da quei che la glieud savess tschintschar ed ha perquei catschau naven tei. Il paster pign ha liu ir cun tei, E vus essas ir e mai pli turnai.

Cheu savess la historia esser alla fin, cun la remarca ch'il zezen ed il paster pign seigien i cun la brocca. Mo cu ti eis stada naven ha il signun fatg persenn che tut era semidau. Avon tut che prueva e prosperava ed uss che ti eras naven tut che pireva. Ti has giu da star botta per l'alp ch'ei ida en mal. Ti ed il paster pign. Vus dus veis survegniu la cuolpa. E per cementar quella cuolpa ha il signun inventau la discordia denter vus dus. E sustattihau vossa nunhabilitad da vegnir perina. Tgei, vus eras o dils peis omisdus e veis buca pli ni liu ni saviu seguistificar. Al buob ha el mess en bucca la maltscheccadad e la stinadedad affonila ed ord tei ha el fatg ina sontga. Mo per la paga eis ti lu veginida numnada quella che ha sfundrau il buob ella tiara. E ti eis era daventada quella che ha smalediu l'alp e fatg in desert ordlunder. E per che negin vegni sissu han il signun e ses veginentsuenter fatg in misteri ordlunder ed admoniu che misteris seigien buc cheu per vegnir revelai. E schiglioc mondi ei sco quei ch'ei seigi iu cul paster pign.

## III

Jeu sai buc sch'jeu vai da scriver: ti eis stada, ni ti eis staus siat stads ad alp – „mai quendisch dis meins“. Ord disa stun jeu tier la fuorma feminina. Malgrad che ti eis ni um ni dunna. Ti eis omisdus. Ni tuts treis, il paster pign aunc vitier. Tia figura ei simbol. Tia historia ina historia en maletgs. Naven dall'entschatta. Siat stads „mai quendisch dis meins“ vul buc gir che ti seigies stada quasi siat stads entiras ad alp. Tia canzun entscheiva buc cun ina indicaziun dil cuoz dil temps, mobein cun ina indicaziun dalla qualitad dil temps. Tiu temps era quasi secumplenius. Sulettamein quendisch gis muncavan, in miez viadi dalla glina. Ed exact en quei temps eis ti veginida menada en empruament. Sontga eras ti buc el senn dalla baselgia. Ti eras sontga el senn da sauna, entira. Ti incorporavas la harmonia, l'unitad. Ti eras feminina e masculina, senza che ti vessies fatg persenn ei. Ti eras semplamein e basta.

Tochen queigi che ti eis ruclada. Sin la platta dalla enconuschiantscha. Quei gi ei tia unitad sespartgida. Ti eis daventada polara. Anoviars um, endadens dunna. Ed entras quella scurlada sin la platta ei quei ch'era endadens e zuppau semussau anoviars. „Igl ei scurclau tiu bi sein alv.“ Il paster pign ei exat aschi pauc sco ti tezza ina figura reala - è el ei simbol, maletg. El ei tia vusch interna che muossa la via a ti. Ed el vul che ti vegnies cunscienta da tiu pass da svilup. El vul che ti fetschies persenn tia polaritad, che ti miries anen ed ano. Che ti vesies tias varts claras e stgiras, tias varts femininas e masculinas. Il signun, vies signun, ei tiu cunsient, tiu spért, tiu intelletg. E quel sto naturalmein è far persenn e realisar la scurlada sin la platta. Perquei taluna il

paster pign ton danavon: „Quei sto nies signun ir a saver e quei sto nies signun ir a saver“. Mo ti vulas supprimer l'enconuschiantscha. Per tut prezi. Perquei discuoras ti cul paster pign adina da „siu“ signun, e buc dil tiu ni dil vies. Ti emprovas cun tut tes duns da cuscentar tia vusch interna ch'insista ad in contin. Ti eis aunc rentada puramein ella materia, il spért po aunc buc penetrar. perquei ein ils beins che ti proponas exclusivamein beins materials. Mo il paster pign drova buc quels. El dat d'entellir ei a ti. „Quei vi jeu buc, quei prend jeu buc“, insista el. Mo ti marcadas vinavon. Veggas en ina vera febra. Ti vesas il paster pign sco smanatscha e buc sco salvament. Perquei sfundras ti el tochen culiez. Lu dat el in amen pausa. Mo strusch ch'el haregia danovamein sfundras ti el „treis tschuncheismas ault“. E lu eis ti persa per inaga. Vesas buc il signun ed audas buc il paster pign pli. Ti sas mo prender comiau aunc da quei ch'era. Il mund paradisic dall'alp eras ti. Ussa semida quei mund. Las vaccas dattan buc latg pli, la fontauna schigia, la jarva secca. La basa dalla prosperaziun daventa dira. Tia spirala da svilup stat eri in'uriala. „Sapi Dieus, cur jeu cheu tuorn“, sedamondas ti. Sco sche ti savesses ch'ei dat mintga gi, adina e dapertut, novs retuorns.

Ord:

Ischi, annada 75, nr. 2, 1990, p. 73ss.